



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E
TË DHËNAVE PERSONALE
DREJTORIA E PËRGJITHSHME PËR MBROJTJEN E TË DHËNAVE PERSONALE
DREJTORIA E MBIKËQYRJES NË FUSHËN E DREJTËSISË PENALE DHE
SIGURISË PUBLIKE

Nr. 2415/6 prot.

Tiranë, më 26.12.2024

REKOMANDIM

Nr. 38, datë 26.12.2024

PËR KONTROLLUESIN

“QENDRA KOMBËTARE PRITËSE E VIKTIMAVE TË TRAFIKIMIT”

Në mbështetje të neneve 29, 30, 31 dhe 32 të ligjit nr. 9887, datë 10.03.2008 “Për mbrojtjen e të dhënave personale”, i ndryshuar (në vijim, “Ligji”), neneve 77-112 të ligjit nr. 44/2015 “Kodi i Procedurave Administrative të Republikës së Shqipërisë” (në vijim, “Kodi i Procedurave Administrative”), si dhe provave të administruara në ngarkim të Kontrolluesit “Qendra Kombëtare Pritëse e Viktimave të Trafikimit” (në vijim, “Kontrolluesi ose QKPVT”),

KONSTATOVA SE:

Në zbatim të Urdhrit nr. 197, datë 14.11.2024 të Komisionerit për të Drejtën e Informimit dhe Mbrojtjen e të Dhënave Personale (në vijim, “Komisioneri”), u krye hetimi administrativ pranë Kontrolluesit, me objekt:

- *Zbatimi i ligjit nr. 9887, datë 10.03.2008 “Për mbrojtjen e të dhënave personale”, i ndryshuar dhe akteve të miratuara nga Komisioneri në lidhje me mbledhjen, përpunimin, ruajtjen dhe sigurinë e të dhënave personale, gjatë kryerjes së aktivitetit nga Kontrolluesi.*

Komisioneri, pasi shqyrtoi procesverbalin e konstatimit, provat e administruara gjatë ushtrimit të hetimit, si dhe relacionin e hetimit administrativ pranë Kontrolluesit, vëren se:

1. Qendra Kombëtare Pritëse e Viktimave të Trafikimit është person juridik publik, që ushtron veprimtarinë e tij, në varësinë e Shërbimit Social Shtetëror, me qëllim rehabilitimin e grave, vajzave dhe fëmijëve të trafikuar, ose të identifikuar si potencial

trafikimi, duke ju ofruar një vendqëndrim të përkohshëm, të sigurt, jashtë rrezikut, si dhe ndihmë të specializuar për riaftësimin dhe rikthim në jetën normale.

QKPVT organizohet dhe funksionon në bazë të ligjit nr. 121/2016 “Për shërbimet shoqërore në Republikën e Shqipërisë”, VKM nr. 589, datë 28.08.2003 “Për ngritjen dhe vënien në funksionim të Qendrës Pritëse të Viktimave të Trafikimit”, VKM nr. 582, datë 27.07.2011 “Për miratimin e Procedurave Standarde të Veprimit për Identifikimin dhe Referimin e Viktimave/Viktimave të Mundshme të Trafikimit”, VKM nr. 658, datë 17.10.2005 “Për standardet e shërbimeve shoqërore”, VKM nr. 195, datë 11.04.2007 “Për miratimin e standardeve të shërbimeve të përkujdesit shoqëror, në qendrat rezidenciale, për personat e trafikuar ose në rrezik trafikimi”, Kodi i Punës e aktet nënligjore në zbatim të tij, si dhe Konventa Evropiane për të Drejtat e Njeriut.

2. Kontrolluesi, bazuar në VKM nr. 195, datë 11.04.2007 “Për miratimin e standardeve të shërbimeve të përkujdesit shoqëror, në qendrat rezidenciale, për personat e trafikuar ose në rrezik trafikimi”, legjitimohet të përpunojë të dhënat personale të Viktimave të Trafikimit dhe Viktimave të Mundshme të Trafikimit, të identifikuar me termin “Përfitues”.

Rezulton se, Kontrolluesi, në funksion të veprimtarisë së tij, përpunon të dhëna personale dhe të dhëna sensitive, pjesë të dosjeve të përfituesve nga programet dhe shërbimet e përkujdesit shoqëror, në qendrat rezidenciale, për përfituesit.

QKPVT përpunon të dhëna personale, lidhur me: “Të dhënat e identifikimit”, “Të dhëna biometrike”, “Adresa”, “Numri i sigurimit shoqëror”, “Diploma, certifikata”, “Foto”, “Të dhëna ekonomike dhe financiare”, “Imazhe nëpërmjet sistemit CCTV”, si dhe të dhëna sensitive, për kategoritë: “shëndeti”, “rraca/etnia” dhe “gjendja penale”.

Përpunimi i këtyre të dhënave kryhet në mënyrë manuale dhe elektronike, të administruara në formë tabelare.

3. Nga analizimi i kuadrit rregullator të administruar, mbi funksionimin e QKPVT dhe rregullores së brendshme për “Organizimin dhe Funksionimin e Qendrës Kombëtare Pritëse të Viktimave të Trafikimit”, nuk identifikohet qartë kohëzgjatja e trajtimit dhe ri-integrimit në jetën normale, duke e bërë të pamundur identifikimin e afateve konkrete për ruajtjen e të dhënave personale dhe të dhënave sensitive.

Lidhur me përpunimin e të dhënave personale gjatë ofrimit të shërbimeve nga QKPVT, konstatohet se, Kontrolluesi nuk ka parashikuar afate për kohën e ruajtjes së tyre, në kundërshtim me parimin e mbrojtjes së të dhënave personale, sanksionuar në germën “d”, të pikës 1, të nenit 5, të Ligjit.

Për sa më sipër, Zyra e Komisionerit vlerëson se, lidhur me kategoritë e të dhënave të grumbulluara, në funksion të ushtrimit të veprimtarisë së tij, Kontrolluesi duhet të parashikojë mbajtjen e të dhënave personale të grumbulluara në atë formë, që lejon identifikimin për një kohë të caktuar, por jo më tepër se sa është e nevojshme për të përmbushur qëllimin për të cilin të dhënat janë grumbulluar. Koha e ruajtjes së të dhënave personale duhet të përcaktohet nga Kontrolluesi, në përputhje me parashikimin e gurmës “d”, të pikës 1, të nenit 5 të Ligjit.

4. Gjatë hetimit administrativ të zhvilluar, pranë ambienteve ku Kontrolluesi ushtron veprimtarinë, rezulton se, ky i fundit disponon sistem video survejimi CCTV, i cili përbëhet nga 19 kamera, të vendosura në ambientet e jashtme dhe të brendshme, për qëllim të mbrojtjes së pronës dhe jetës, si dhe sigurimin e kontrollit mbi hyrjet dhe daljet nga ambientet e QKPVT.

Gjithashtu, është konstatuar se Kontrolluesi nuk ka vendosur tabelat informuese në të gjithë ambientet e survejuara nëpërmjet sistemit CCTV, me anë të të cilave, informohen subjektet e të dhënave mbi përpunimin e të dhënave imazhe/video, në kundërshtim me parashikimet e nenit 18 të Ligjit dhe Udhëzimin nr. 3, datë 05.03.2010 të Komisionerit “Mbi përpunimin e të dhënave personale me sistemin e video survejimit në ndërtesa dhe mjedise të tjera”, i ndryshuar (në vijim, “Udhëzimi nr. 3”).

Zyra e Komisionerit vlerëson se, një nga mjetet e rëndësishme të përpunimit të të dhënave personale është edhe sistemi i video survejimit CCTV. Të dhënat e ruajtura në këto sisteme, si: “imazhe” dhe “video”, janë të dhëna personale dhe përpunimi i tyre duhet të jetë në përputhje me parashikimet e Ligjit, si dhe aktet e miratuara nga Komisioneri në lidhje me mbledhjen, përpunimin, ruajtjen dhe sigurinë e të dhënave personale, gjatë kryerjes së aktivitetit nga Kontrolluesi.

Për më tepër, informimi i subjekteve të të dhënave personale mbi prezencën e sistemit të video survejimit CCTV është një nga detyrimet bazë të Kontrolluesit, pasi u jep mundësinë subjekteve të të dhënave personale, të njihen me të drejtat që gëzojnë dhe mundësinë e ushtrimit të tyre në praktikë. Mospërmbushja e këtij detyrimi nga ana e Kontrolluesit mund të sjellë pasoja të rënda sa i përket privatësisë dhe përpunimit të të dhënave personale të subjekteve të të dhënave.

5. Kontrolluesi ka vendosur në dispozicion të grupit të hetimit administrativ, kontratën e nënshkruar me shoqërinë “Denisa Mana, Mana Security Group sh.p.k”, me objekt: “riparim, mirëmbajtje e sistemit të kamerave të sigurisë së Q.K.P.V.T” .

Nga shqyrtimi i përmbajtjes së kontratës së mësipërme, rezulton se, në të, nuk janë reflektuar detyrimet, sipas parashikimit në nenin 20 të Ligjit dhe Udhëzimit nr. 19, datë 03.08.2012 të Komisionerit “Mbi rregullimin e marrëdhënieve mes kontrolluesit dhe përpunuesit në rastet e delegimit të përpunimit të të dhënave dhe përdorimit në një kontratë tip në rastet e këtij delegimi”, i ndryshuar (në vijim, “Udhëzimi nr. 19”).

Zyra e Komisionerit vlerëson se, të gjitha detyrimet e sanksionuara në nenin 20 të Ligjit dhe Udhëzimin nr. 19, duhet të jenë të përfshira në kontratën dhe/ose aneks kontratën e hartuar dhe nënshkruar mes kontrolluesit dhe përpunuesit. Çdo kontratë përpunimi që ka për qëllim delegimin e përpunimit të të dhënave personale duhet të përmbajë dispozita që vendosin rregulla për përpunimin e të dhënave personale, sipas legjislacionit në fuqi. Çdo kontratë e tillë duhet të parashikojë masat konkrete që duhet të marrë përpunuesi për të siguruar dhe garantuar mbrojtjen e mjaftueshme të të dhënave, si dhe hapat që do të ndërmerren në rast cenimi të të dhënave, me qëllim që të sigurojë paprekshmërinë e tyre, në çdo hallkë të këtij përpunimi.

6. Nga verifikimi i kryer në regjistrin elektronik të subjekteve kontrolluese, si dhe në protokollin e Zyrës së Komisionerit rezulton se, Kontrolluesi ka përmbushur detyrimin për “*Njoftim*”, në zbatim të neneve 21 dhe 22 të Ligjit. Megjithatë, konstatohet se “*Formulari i Njoftimit*” nuk është i përditësuar, e për rrjedhojë nuk është i saktë, në lidhje me deklarinimin në rubrikën 5: “*Të dhënat sensitive që përpunohen*”, sa i takon të dhënave për jetën seksuale të përfituesve.

Konstatimet e mësipërme janë në kundërshtim me parashikimet e neneve 21 dhe 22, të Ligjit.

Zyra e Komisionerit vlerëson se, detyrimi për “*Njoftim*” mbi përpunimin e të dhënave personale, sikurse edhe përditësimet e vazhdueshme të gjendjes së përpunimit, sipas parashikimeve të nenit 21 të Ligjit është i rëndësishëm, pasi i jep mundësinë subjekteve të të dhënave që të informohen mbi përpunimin që kryen Kontrolluesi, si dhe për realizimin e detyrimeve ligjore në praktikë. Kjo i jep mundësi reale subjekteve të të dhënave për të ushtruar të drejtat e tyre që i jep Ligji.

7. Rezulton se, Kontrolluesi disponon “*Rregullore për mbrojtjen, përpunimin, ruajtjen dhe sigurinë e të dhënave personale*”. Referuar pikës së parë dhe të dytë, të nenit 13, të rregullores “*Masat për sigurinë e të dhënave*”, konstatohet se mënyra e përcaktimit të funksioneve dhe përdorimit të të dhënave personale, kryhet me urdhër të njëjësive organizative ose të operatorëve të autorizuar.

Nga analizimi në tërësi i rregullores “*Për mbrojtjen, përpunimin, ruajtjen dhe sigurinë e të dhënave personale*”, si dhe provave të mbledhura gjatë hetimit administrativ, konstatohet se Kontrolluesi nuk arrin të dokumentojë këtë mënyrë të përcaktimit të funksioneve dhe të drejtave të aksesit, mbi të dhënat personale dhe sensitive, në kundërshtim me parashikimet e nenit 27 të Ligjit.

Gjithashtu, referuar nenit 18, të rregullores “*Monitorimi dhe regjistrimi i aksesit në të dhënat personale*”, përcaktohet ngritja e një sistemi, i cili i nënshtrohet normave të veçanta të sigurisë për ruajtjen e paprekshmërisë dhe përditësimin e tyre, si dhe është i ndërtuar mbi bazën e identifikimit të përdoruesit në çdo kohë, në një terminal të caktuar, vendin e punës ose pajisje të tjera për periudhën për të cilën të dhënat janë

ruajtur. Hyrja në të dhënat dhe informacionet që popullohet ky sistem, lejohet ose pengohet me programe të veçanta elektronike.

Referuar deklarimeve verbale të përfaqësuesve të Kontrolluesit, si dhe provave të administruara gjatë hetimit administrativ, rezulton se nga ana e QKPVT, nuk administrohet asnjë sistem i tillë elektronik, dhe se e vetmja mënyrë përpunimi e të dhënave personale, është ajo manuale, në përgatitjen e dosjeve fizike të përfituesve.

Për sa më sipër, rezulton se, Kontrolluesi parashikon rregulla të përgjithshme, në rregulloren “*Për mbrojtjen, përpunimin, ruajtjen dhe sigurinë e të dhënave personale*”, mbi proceset përpunuese që kryen gjatë ushtrimit të veprimtarisë së tij, si dhe nuk parashikon afate konkrete për mbajtjen dhe shkatërrimin e të dhënave, në kundërshtim me parashikimet e nenit 27 të Ligjit.

Zyra e Komisionerit vlerëson se, Kontrolluesi, në rregulloren “*Për mbrojtjen, përpunimin, ruajtjen dhe sigurinë e të dhënave personale*”, parashikon rregulla të përgjithshme dhe jo direkt të aplikueshme, lidhur me proceset përpunuese që kryen gjatë ushtrimit të veprimtarisë së tij, duke mos parashikuar në të, rregulla dhe procedura organizative specifike mbi nivelet e aksesit në të dhënat personale, në përputhje me detyrat funksionale të çdo punonjësi, referuar pozicionit të punës, në kundërshtim me parashikimet e nenit 27 të Ligjit, si dhe Vendimit nr. 6 të Komisionerit, datë 05.08.2012 “*Për përcaktimin e rregullave të hollësishme për sigurimin e të dhënave personale*” (në vijim, “*Vendimi nr. 6*”).

Për këtë arsye, Zyra e Komisionerit vlerëson se, është i nevojshëm rishikimi i këtij akti, ku të parashikohen rregulla dhe procedura organizative specifike mbi mënyrën e përpunimit të të dhënave personale, masat e sigurisë së të dhënave, nivelet e aksesit në të dhënat personale sipas proceseve përpunuese (konkretisht, në nenin 13 “*Masat për sigurinë e të dhënave*” dhe në nenin 18 “*Monitorimi dhe regjistrimi i aksesit në të dhënat personale*”, ku përshkruhen procese përpunimi të të dhënave, të cilat nuk gjejnë zbatim konkret në objektin e aktivitetit të Kontrolluesit), në kundërshtim me parashikimet e nenit 27 të Ligjit, si dhe Vendimit nr. 6 të Komisionerit.

8. Të miturit, si shoqërues të subjektit përfitues, që trajtohen nga Kontrolluesi (*foshnjat e lindura nga viktimat e trafikimit/viktimat e mundshme të trafikimit*), nuk identifikohen në rregulloren “*Për mbrojtjen, përpunimin, ruajtjen dhe sigurinë e të dhënave personale*”, si dhe për këtë kategori subjektsh të të dhënave personale nuk janë hartuar rregulla dhe procedura organizative specifike, mbi mënyrën e përpunimit të të dhënave personale, sigurinë e të dhënave, konfidencialitetin, afatet e mbajtjes së të dhënave, nivelet e aksesit etj., si një detyrim shumë i rëndësishëm, në zbatim të nenit 27 të Ligjit, pasi shmang pasojat e rënda që mund të vijnë për subjektet e të dhënave.

Të dhënat e administruara nëpërmjet kartelave dhe çdo dokumentacioni tjetër shëndetësor, ruhen në ambientet e zyrës së arkivit, duke mos marrë, midis të tjerash,

masa organizative dhe fizike, si një kategori e veçantë, të cilës duhet t'i sigurohet mbrojtje e dyfishtë dhe vëmendje e shtuar për të garantuar mbrojtjen dhe sigurinë e tyre, në përputhje me nenin 27 të Ligjit, si dhe nenit 5 dhe 8 të Udhëzimit nr. 49 të Komisionerit.

Zyra e Komisionerit vlerëson se Kontrolluesi është i detyruar të marrë masa sigurie, sipas nenit të 27 Ligjit, për mbrojtjen e të dhënave personale të përfituesve (viktimat/viktimat e mundshme të trafikimit) dhe foshnjeve, si subjekte shoqëruese të përfituesve, duke i kushtuar vëmendje të veçantë të dhënave sensitive. Kontrolluesi duhet të hartojë rregulla dhe procedura organizative specifike për këtë kategori të të dhënave personale, në lidhje me mënyrën e përpunimit dhe sigurinë e këtyre të dhënave. Të dhënat sensitive duhet të administrohen në mënyrë të tillë që të garantohet se, përpunimi i tyre i nënshtrohet masave teknike dhe organizative të posaçme, të dedikuara dhe të rishikuara rregullisht, në përputhje me nenin 27 të Ligjit dhe Udhëzimin nr. 49 të Komisionerit.

9. Rezulton se, Kontrolluesi nuk ka kryer Analizë Risku periodike, me qëllim evidentimin e risqeve në përpunimin e të dhënave personale gjatë ushtrimit të veprimtarisë së tij, në kundërshtim me nenin 27 të Ligjit dhe Udhëzimit nr. 47, datë 14.09.2018 të Komisionerit *“Për përcaktimin e rregullave për ruajtjen e sigurisë së të dhënave personale të përpunuara nga subjektet përpunuese të mëdha”* (në vijim, *“Udhëzimi nr. 47”*).

Kontrolluesi nuk ka kryer Analizën e Riskut, për proceset përpunuese gjatë ushtrimit të veprimtarisë, me qëllim evidentimin e rasteve që mund të çenojnë konfidencialitetin, integritetin, disponueshmërinë e të dhënave personale dhe shkallën e riskut të mundshëm, si dhe propozimet e masave për eliminimin apo minimizimin e ndikimit të riskut.

Në kuadër të hartimit të kësaj analize, përveç identifikimit të risqeve, është e rëndësishme që QKPVT, të propozojë masa konkrete për eliminimin ose minimizimin e ndikimit të tyre. Këto masa duhet të jenë të orientuara jo vetëm në mbrojtjen e të dhënave personale, por edhe në sigurimin e përputhshmërisë me kërkesat ligjore dhe standardet e vendosura nga Udhëzimi nr. 47 i Komisionerit. Masat që propozohet të merren duhet të jenë proporcionale me rrezikun e mundshëm dhe të garantojnë mbrojtje efektive të të dhënave personale, si dhe të minimizojnë çdo ndikim negativ që mund të sjellë.

Për më tepër, Analiza e Riskut duhet të përfshijë një plan të qartë veprimi dhe një sistem monitorimi që mundëson vlerësimin e vazhdueshëm të masave të marra dhe përshtatjen e tyre në përputhje me kërkesat ligjore në fuqi. Ky proces është themelor për të siguruar që përpunimi i të dhënave personale kryhet në përputhje me ligjin.

Sa më sipër, vlerësohet se, Kontrolluesi është në kundërshtim me parashikimet e nenit 27 të Ligjit dhe Udhëzimin nr. 47 të Komisionerit.

10. Gjithashtu, rezulton se, Kontrolluesi nuk ka marrë masa për trajnimin e punonjësve që kanë akses dhe përpunojnë të dhëna personale, lidhur me legjislacionin në fuqi për mbrojtjen e të dhënave personale, në kundërshtim me nenin 27 dhe Udhëzimin nr. 47 të Komisionerit.

Zyra e Komisionerit vlerëson se, trajnimet në lidhje me mbrojtjen e të dhënave personale, duhet të jenë të vazhdueshme dhe të përshtatura sipas nevojave dhe proceseve të punës të Kontrolluesit dhe legjislacionit në fuqi për mbrojtjen e të dhënave personale, me qëllim ndërgjegjësimin e punonjësve, të cilët për shkak të proceseve të punës, janë të ngarkuar për përpunimin e të dhënave personale.

Në përfundim të hetimit administrativ, referuar provave dhe konstatimeve në vend, grupi i hetimit administrativ hartoi procesverbalin përkatës, një kopje e të cilit i është dërguar zyrtarisht Kontrolluesit, me rrugë postare.

Në zbatim të neneve 87-89 të Kodit të Procedurave Administrative, Kontrolluesit i është lënë afat të depozitohet pretendimet me shkrim, referuar procesverbalit të hartuar nga ana e grupit të hetimit administrativ, përpara marrjes së vendimit përfundimtar nga ana e Komisionerit.

Përmes shkresës nr. 202/3 prot., datë 18.12.2024, administruar me tonën nr. 2415/5 prot., datë 19.12.2024, QKPVT, ka depozituar pranë Zyrës së Komisionerit, pretendimet lidhur me procesverbalin e hetimit administrativ.

- Nga shqyrtimi i dokumentacionit të dërguar, rezulton se Kontrolluesi nuk ka depozituar dokumentacion shtesë provues, në lidhje me konstatimet e procesverbalit. Gjithashtu, nga përmbajtja e pretendimeve, rezulton se QKPVT, nuk i ka të qarta detyrimet e parashikuara në Ligj, lidhur me përcaktimin e niveleve të aksesit, afateve konkrete për çdo proces përpunimi në dokumentacion shkresor dhe elektronik, si marrje e masave teknike e organizative lidhur me sigurinë e të dhënave, në zbatim të nenit 27 të Ligjit.

Megjithatë, Zyra e Komisionerit ka analizuar gjithë dokumentacionin e vendosur në dispozicion nga QKPVT, duke marrë në konsideratë sensitivitetin e të dhënave të përpunuara dhe fushën e veprimtarisë së Kontrolluesit, e më pas në mënyrë të detajuar, ka argumentuar sipas pikave të sipërcituara, vlerësimin përkatës, në përputhje me gjetjet e grupit të hetimit administrativ, si dhe verifikimet e bëra në terren.

Për këtë arsye, Zyra e Komisionerit, lidhur me pretendimet e Kontrolluesit, ka rekomanduar se, është i nevojshëm rishikimi i akteve të brendshme rregullatore, ku të parashikohen rregulla dhe procedura organizative specifike mbi mënyrën e përpunimit të të dhënave personale, masat e sigurisë së të dhënave, nivelet e aksesit

në të dhënat personale sipas proceseve përpunuese konkrete, në përputhje me parashikimet e nenit 27 të Ligjit, si dhe Vendimin nr. 6 të Komisionerit.

Në përfundim, Zyra e Komisionerit vlerëson bashkëpunimin e Kontrolluesit me grupin e kontrollit gjatë ushtrimit të hetimit administrativ, si dhe angazhimin e tij për të rikuperuar shkeljet e konstatuara.

PËR KËTO ARSYE:

Në zbatim të neneve 5, 18, 20, 21, 22, 27, 29, 30, 31 (pika 1, germa “a/1”), si dhe 32 të Ligjit,

REKOMANDOJ:

1. Kontrolluesi, të marrë masa për përcaktimin e afateve kohore për ruajtjen e të dhënave personale, referuar çdo procesi përpunimi të të dhënave personale, në përputhje me germën “d”, të pikës 1, të nenit 5 të Ligjit;
2. Kontrolluesi, të marrë masa për vendosjen e tabelave informuese në ambientet e survejuara përmes sistemit CCTV, me qëllim informimin e plotë të subjekteve të të dhënave, sipas parashikimeve të nenit 18 të Ligjit dhe Udhëzimin nr. 3 të Komisionerit;
3. Kontrolluesi, të përfshijë në kontratën dhe/ose aneks kontratën e shkruar mes Kontrolluesit dhe Përpunuesit, detyrimet për përcaktimin e rregullave specifike në lidhje me marrëdhënien mes palëve, në rastet e delegimit të përpunimit të të dhënave, sipas dispozitave të parashikuara në nenin 20 të Ligjit dhe Udhëzimin nr. 19 të Komisionerit;
4. Kontrolluesi, në zbatim të neneve 21 dhe 22 të Ligjit, të ketë në vëmendje përditësimin e “Njoftimit”, në lidhje me ndryshimin e gjendjes së njoftimit të përpunimit të të dhënave personale, të cilat përpunon;
5. Kontrolluesi, të marrë masa për rishikimin në “Rregulloren për mbrojtjen, përpunimin, ruajtjen dhe sigurinë e të dhënave personale”, të masave konkrete teknike dhe organizative për mbrojtjen e të dhënave personale dhe të dhënave sensitive, mënyrat e përpunimit të të dhënave, të drejtat e subjekteve të të dhënave, garantimin e konfidencialitetit, niveli i aksesit etj., në funksion të aktivitetit të tij, për çdo proces përpunimi, në zbatim të nenit 27 të Ligjit.
 - Gjithashtu, Kontrolluesi të marrë masa për vendosjen e rregullave të posaçme për mbrojtjen e të dhënave personale e sensitive të foshnjeve dhe Viktimave të Trafikimit/Viktimat e Mundshme të Trafikimit, në lidhje me mënyrën e përpunimit dhe sigurinë e këtyre të dhënave, në përputhje me nenin 27 të Ligjit dhe Udhëzimin nr. 49 të Komisionerit;

6. Kontrolluesi, të marrë masa për hartimin e Analizës së Riskut, gjatë ushtrimit të veprimtarisë, me qëllim evidentimin e rasteve që mund të cënojnë konfidencialitetin, integritetin dhe disponueshmërinë e të dhënave personale, sipas parashikimeve të nenit 27 të Ligjit dhe Udhëzimit nr. 47 të Komisionerit;
7. Kontrolluesi, me qëllim garantimin e sigurisë së të dhënave personale, duhet të zbatojë detyrimet e përcaktuara në Udhëzimin nr. 47, lidhur me trajnimin e punonjësve që kanë akses dhe përpunojnë të dhëna personale, në përputhje me proceset përpunuese që ata kryejnë gjatë veprimtarisë së tyre;
8. Në zbatim të pikës 1, të nenit 32 të Ligjit, të përmbushen detyrimet sipas këtij akti brenda afateve, si vijon:
 - (i) vazhdimisht, detyrimet e treguara në pikën 7 më sipër;
 - (ii) brenda 15 (pesëmbëdhjetë) ditëve, detyrimet e treguara në pikat 2 dhe 4 më sipër;
 - (iii) brenda 30 (tridhjetë) ditëve, detyrimet e treguara në pikat 1, 3 dhe 5 më sipër;
 - (iv) brenda një viti kalendarik, detyrimin e treguar në pikën 6 më sipër;

Afatet e sipërpërmendura fillojnë nga data e marrjes dijeni të këtij akti;

9. Kontrolluesi të njoftojë Zyrën e Komisionerit për masat e marra;
10. Në rast mospërmbushje të detyrimeve të parashikuara në këtë akt, Komisioneri vepron sipas pikës 2, të nenit 30 dhe nenit 39 të Ligjit, të cilët parashikojnë se në rast shkeljesh serioze, të përsëritura ose të qëllimshme të Ligjit nga një kontrollues ose përpunues, veçanërisht në rastet e përsëritura të moszbatimit të rekomandimeve të tij, Komisioneri vendos sanksione administrative për kundërvajtjet administrative përkatëse dhe e denoncon publikisht ose e raporton çështjen në Kuvend dhe në Këshillin e Ministrave.

Ky Rekomandim u shpall sot, më 26.12.2024.

KOMISIONERI

Besnik Dervishi